

爲質闇珍府固不可辭也、伏望鴻慈曲垂以納下臣之欵、且副上天之心、不任鳬藻之至、奉表陳乞以聞、
壬戌詔曰、朕以昧德忝纂君臨乘奔軫懷、納隍銷志、分宵廢寢、憂萬方之未安、興晨忘食、懼八政之或
殊、近有非雲見諸內外、公卿表賀辭不敢當、尙亦頻奏推之不得、誠如來表、豈謂在己、此則七廟之靈感
恩如在、二儀之感、徵祥自臻、今欲報德蒼天、寄彼祖宗、播惠黎蒸、共此嘉祝、可大赦天下、自天長三年十
二月卅日昧爽以前、大辟以下、罪無輕重、未發露已發露、未結正已結正、繫囚見徒、咸皆赦除、但犯八虐
故殺、謀殺、私鑄錢、強竊、二盜、常赦所不免者、不在赦例、其初見人、五位者進位一階、六位已下者二階、正
六位上者、廻授一子二階、自丁免當戶今年調庸、又內外文武官主典已上加位一級、但正六位上者、廻
授一子、若無子者、宜量賜物、五位已上子孫年廿已上者、亦叙當蔭之階、天下老人百歲已上、賜穀三斛、
九十已上二斛、八十已上一斛、鳏寡孤獨不能自存者、量加賑恤、孝子順孫義夫節婦旌表門閨、終身勿
事、普告遐邇、咸使知聞、七年正月丁丑、御大極殿受賀、左衛門督清原真人長谷、奏治部卿從四位上
源朝臣信等所奏、阿波國景雲并越前國木連理等瑞奏畢還宮、御紫宸殿宴侍臣、賜御被、

續日本後紀仁明承和元年正月丁卯先是太宰府上言慶雲見於筑前國至是太政官左大臣正三位
臣藤原朝臣緒嗣中略等上表言、臣聞泰以應而爲象、咸以感而成卦、明聖人在上、鬼神不能違其感、至
德傍通、天地有以從其應、伏惟皇帝陛下、承累聖之皇基、纂重光之寶祚、握鏡揚蘿、燭貞輝於就日、懷珠
稱慶、慶雲曜於望雲道冠二儀、歸功先德、化孚四表、推美神宗、伏見太宰大貳從四位下、藤原朝臣廣敏
等奏稱慶雲見於筑前國那珂郡中略謹詣闕奉表陳賀、勅報曰、禎符之應、不肯虛行、靈貺攸臻、必鍾實
德、所以唐堯上聖、猶讓而不預、漢光中興、固拒而鮮記、朕不承寶曆、司牧寰區、化謝暨幽、感乖動物、而今
景雲著見、公卿表賀、朕之菲薄、何以當之、論不云乎、百姓寧輯風雨、調和此亦瑞也、然則安危在乎人事、
吉凶繫於政術、政術或差、休祥未能成其美、王道欽明、咎徵不能致其惡、以此談之、策勦爲可冀也、日慎
一日、雖休勿休、賀瑞之言、閉而不聽、四月壬午、公卿重上賀慶雲表、十月己卯、佐渡國言、慶雲見焉、